

Seni Preseten
Thomas S. Monson



Kinamwe, Kopwe Asoso

Fan eu ran ekkoch ier ra no, mwirin ua tumunu ekkoch mettochun angang, ua mefi pwe upwe churi emon fefin mi mano punuan i emon chon nonnom non neninen tumunu chinnap non Salt Lake City. Ua chok wawa wai we ikkewe.

Nupwen ua feino ngeni rumwan, ese wor masouan. Ua eisini emon chon angang ia a nom ia me a emweniei ngeni eu nenien asoso. Ikkewe ua kuna ei fefin mi mano punuan a chufengen ren pwiin we me pwan emon chienan. Aua pwapwa ne poporaus fengen.

Nupwen aua poraus, emon mwan a feino ngeni ewe rumw ne angei unuman soda seni ewe mwasin. A nengeniei me a apasa, “En, ka Tom Monson.”

“Ewer,” ua pwonueni. “Me ka nikinikinin emon Hemingway.”

A ponueni pwe i Stephen Hemingway, noun Alfred Eugene Hemingway, a wisen ai chon aninis nupwen ua emon pisiop fitu ier me nom me ua chok kokkori pwe itan Gene. Stephen a ereniei pwe seman we a nom non ewe chok neni me chipu epwene mano. Gene a kokkori itei, me chon ewe famini ra mochen fos ngenieie nge rese tufichin kuna eu nampan fon fan itei.

Ua muttir feino ren Stephen ngeni rumwen ai chon aninisin nom, ikkewe a wor pwan ekkoch noun kewe semirit ra chufengen, me punuan we a fen mano ekkoch ier me nom. Ekkewe chon famini ra nuku pwe ai kuna

Stephen non ena rumwen asoso pwe ponuen Semach won Nang ren ar ennetin mochen pwe upwe kuna semer me mwen a mano me ponueni an kokko. Ua pwan mefi ina usun, pun ika Stephen ese tonong non ewe rumw ikkewe ua nom non ewe chok fansoun a feito, usap fen sinei pwe Gene a nom non ena neni.

Aua awora eu efeioch ngeni. Ewe ngunun kinamwe a nonnom. Aua pwapwa ne chufengen, me mwirin ua su senir.

Sorotan emon a kokkorieie me pwar ngenieie pwe Gene Hemingway a mano—ukukun 20 minoch mwirin angei efeioch seni am me noun we at.

Ua pwarata eu iotekin kinisou ngeni Semach won Nang ren An emwen, minne a emwenieie ai upwe feino ngeni ewe nenien tumunu chinnap me a emwenieie ngeni chieneie we Alfred Eugene Hemingway.

Ua nuku pwe ekiekin Gene Hemingway non ena pwinin—nupwen ewe Ngun mi Fel a nom neich, a pwan ikiotek netipetekison, me a awora feiochun pristut—a pwan nikinikin kapasen ewe kon “Master, the Tempest Is Raging”:

*Kopwe nonnom, O Chon Angaseno mi fefeioch!
Kosap nikitieie ai upwe aneamon,
Me ren pwapwa upwe tori ewe neni mi feioch
Me upwe asoso non ena nenien kinamwe.*

Ua chuen tongei ena kon me ua pwarata usun ewe kinamwe a awora:

*Ina mo nowatten nesat mi menumen
Are chon ir mi ngaw are met chok,
Ese wor sat epwe orumi ewe siip ikkewe a nom
Ewe Mastan sat me fonu me nang.
Ir meinsin repwe anneasosichi netipom:
Kimanwe, kopwe asoso.¹*

Seni chonun mas me sossot, seni niuokus me neti-pechou, seni tipemwaremwar me memefin anaemon mwirin chon tongei ra mano, mi wor pwarata pwe manau ese much. Ach Samon me Chon Amanau mi ewe minen pwarata mi manau.² An kapas non pukfel mi och: “Oupwe ukutiw ne fiu, iwe oupwe sinei pwe ngang Kot” (Psalm 46:10). Ua pwarata pwe mi ennet.

ESINESIN

1. “Master, the Tempest Is Raging,” *Hymns*, nampa. 105.
2. Nengeni Richard L. Evans, “So Let Us Live to Live Forever,” *New Era*, July 1971, 18.

AFANAFAN SENI EI POROUS

Ei poraus mi tongeni awora kinamwe ngeni ekkewe ir mi tongei emon a mano are ekkewe ir ra weires fan osukosuk. Fiti porausen Preseten Monson, kopwe ekiekin aporaus a eu nein ekkei wokisin, anongo-nong won namwotan ekkewe ir ka aiti: Job 19:25–26; 1 Korinth 15:19–22; Mosaia 24:13–15; Doctrine and Covenants 122:7–9. Ika ka angei emwen, kopwe tongeni pwarata usun ewe kinamwe ewe Chon Amanau a awora ngonuk non om sossot.

SERAFO

Kose Mochen Kopwe Echikarata Netipei

Seni Kelsey LeDoux

Won ewe ranin achechemenien manon mongieie we, ua ekieki usun manau ei seni fansoun an

mano. Use chok chechemeni ennetin ewe metek ua mefi nge pwan ekkewe feioch Kot a ngenie.

Use weweiti ifa usun aramas ra tongeni apasa pwe manon emon ra tongei a tongeni efisiata feioch. Use tongeni weweiti ifa usun ua tongeni mefi pwapwa me kinisou ren eu mettoch mi fakkun metek chapur. Iwe nge, mi wor eu pwin, amen siwini ai ekiek.

Ua pwata nukenipwin ren choun netipei mi fakkun napanap. Ewe metek a fakkun weires fan itei. Ua fotopukutiw me ua kechiweta eu iotek ngeni Semei won Nang. Unusen manau ei ua kao usun ewe Achasefan me an Jises Kraist we manamanen chikar. Iei ai nuku mi sossot. Ua ennetin nuku? Ua tingorei Semei won Nang an epwe echikarata netipei. Ewe metek mi fakkun napanap ai upwe mefi anaemon chok.

Mwirin ua mefi kinamwe, chacharin netip, me tong won unusen inisi. Ua mefi ita pwe Kot a turufie ren poun kewe me a tumunuei seni ennetin ewe metek ua mefi. Ua chuen pwsiti mongieie, nge ua tongeni kuna ren foun mas mi sokkono. Mi wor chommong ai upwe kao seni ei fansoun.

Ua sinei an ewe Samon tong me kinamwe mi non-nom fan itach. Mi namwot chok pwe sipwe etiwa.

SEMIRIT

Kopwe Finata ne Kinamwe

Preseten Monson a apasa pwe nupwen sia asoso me mosonoson, sia tongeni mefi kinamwe me weri pochokunen kapasen pwaratan Semach won Nang. Me ewe Ngun mi Fel a tongeni aitikich usun napanapan anisi ekkoch.

Kopwe makketiw are poraus fengen ren semom me inom usun eu napanap ka tongeni kinamweno. Iwe kopwe aea och fansoun non ei wik ne sotuni. Mwirin ka sotunii, ka tongeni makkei non noum puken achechem usun ekkewe memmef me pwarata ka angei.

© 2013 seni Intellectual Reserve, Inc. Meinsin pung mi kawor. A för non Amerika. Kapungunon non fosun Merika: 6/12. Kapungunon chiakun: 6/12. Chiakun First Presidency Message, March 2013. Chuukese. 10663 901



Nuku, Famini, Aninis

Apochokuna

Kopwe anneani ekkei mettoch iwe, nupwen mi och, kopwe aporausa ren ekkewe fefin ka churir. Kopwe aea ekkewe kapas eis ne anisuk ne apochokuna ekkewe fefin ka churir me pwan aochu manauom ren aean Fin Anisi. Ren pwan ekkis poraus, kopwe nengeni www.reliefsociety.lds.org.

Ach soufos, Preseten Thomas S. Monson, a peseni ngenikich ne “eitau ne amanaua ekkewe ir mi namwot ach aninis me ekieta ir ngeni ewe anenap me ewe napanapoch. . . . Iei angangen ewe Samon, me nupwen sia föri angangen ewe Samon, . . . sipwe angei aninis seni ewe Samon.”¹

Chommong ier ra no LaVene Call me chienan we chon amwa ra churi emon fefin ese pochokun non fan. Ra fichifich won ewe asam me ra kuna emon in non ufan ufen tutu. A nikinikinin semwen, nge ra muttir kaeo pwe a osukosuken sakau. Ekkewe chon amwa ra motiw me poraus fengen ren ewe fefin.

Mwirin ra suno, ra apasa, “I emon noun Kot. Wisach pwe sipwe anisi i.” Iwe ra churui fan chommong. Iteitan fansoun, ra tongeni kuna me mefi pwe a ekkesiwin ngeni an epwe ochuno. Me ra tingorei ewe fefin ne fiti mwichen Fin Anisi. Ina mo ese kan mochen, a poputa ne fiti iteitan. Mwirin ekkis pesepes, ir me punuan we me nour we nengin ra fiti fan. Ewe mwan a mefi

ewe Ngun mi Fel. A apasa, “Upwe fori met ewe pisop a apasa.” Iei ra pochokun non Fan me ra ririfengen non ewe tempel.²

Seni ekkewe Pukfel

3 Nifai 18:32; Doctrine and Covenants 84:106; 138:56

Seni Ach Uruo

Anisi ekkewe ir ra rikino me niwinsefan ngeni ewe kapas allimen Jises Kraist mi eu kinikinin ach sipwe Souneng me chon ewe mwichen Fin Anisi. Preseten Brigham Young (1801–77) a apasa, “Sipwe tong fengen nefinach, . . . me sipwe mut ngeni ekkewe ir ra tongeni kuna pwe repwe emweni ekkewe ir rese tongeni kuna tori fansoun ra tongeni pwisin kuna ewe an fan iter.”³

Eliza R. Snow, oruemonun presetenin unusan Fin Anisi, a kinisou ne esinna angangen ekkewe fefin non Ogden, Utah, USA, ne apochokunafengenir. “Ua sinei pwe mi fis chommong [angangen aninis] minne ese mo tori ekkewe puken

[rekot],” a apasa. Nge esinnan pwe mi wor eu rekot won nang usun angangen ekkewe fefin nupwen ra achocho ne angang ngeni ekkewe ir minne netiper a apwangapwangeno, a apasa: “Preseten Joseph Smith a apasa pwe ei mwich mi for ne amanaua ngunun aramas. . . . Pwan eu puk mi mak ren om nuku, kirokiroch, angangoch, me kapas. . . . Ese wor och mettoch mi poutuno.”⁴

ESINESIN

1. Thomas S. Monson, “The Sacred Call of Service,” *Liahona*, May 2005, 55, 56.
2. Taropwe ngeni ewe presetensin Fin Anisi unusan seni noun LaVene Call we nengin.
3. Brigham Young, non *Daughters in My Kingdom: The History and Work of Relief Society* (2011), 107.
4. Eliza R. Snow, non *Daughters in My Kingdom*, 83.

Met Ua Tongeni Fori?

1. Ngang ua pochokun non ekieki ne tingorei emon fefin a apwangapwang ne fitiei non eu mwichen Fin Anisi?
2. Ekkewe fefin ua mammaa ra mefi kinamwe ne kapas eis ngeniei usun ewe kapas allim?